

Tarnimikkut nappaatilinnik nammineersinnaajunnaarsitsineq allatullu pinngitsaaliissummik iliuuseqarneq pillugu Inatsisartut Inatsisissaattut siunnersuut nr. x – xxx 2013-imeersoq.
(Naalakkersuisut)

Saqqummiussissut

(Peqqissutsimut Naalakkersuisoq, Agathe Fontain)

Siullermeerineq

Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaattut siunnersuut, Naalakkersuisut sinnerlugit matumuuna saqqummiutissavara.

Tarnimigut nappaatillip nammineersinnaajunnaarsitaanermut allatigullu pinngitsaaliissummik iliuuseqarfigineqarnermut atatillugu, inatsisitigut inissisimanerata nukittorsarneqarnissaa, Inatsisissatut siunnersuummi saqqummiunneqartumi siunertaavoq. Inatsisissatut siunnersuummi tarnimigut nappaatillip sapinngisaq tamaat katsorsartinnermut imminullu tunngasunut allanut peqataatinneqarnissaa sunniuteqarnissaalu qulakkeerneqassaaq. Napparsimavimmut/peqqinnissaqarfiup immikkoortuanut unitsitaanermut-, uninnganermut-katsorsartinnermullu atatillugu pinngitsaaliinikkut iliuuseqarnissamut piumasaqaatit sukannerulerunerannik ersarinneruleranerannillu, Inatsisissatut siunnersuut nassataqassaaq.

Peqqinnissaqarfimmi tarnimikkut nappaatilinnik katsorsaaniarnermi, peqqinnissamik sullissisut ikiuilluarsinnaaqullugit, pisuni ataasiakkaani katsorsaanermut atatillugu pinngitsaaliissummik iliuuseqartoqartariaqartarpoq- ilaannilu napparsimasoq nappaammunik paasisimanninngippat-pinngitsaaliissummik unitsitsisoqartariaqarsinnaasarluni.

Napparsimasup nammineersinnaassusaanut ataqqinnineq, nappaamminnik peruluutillit katsorsartinnissamik pisariaqartitsisut nappaateqarnerminnilli paasisimanninngitsut, sumiginnagaaneranik kinguneqanngisaannassaaq. Pisariaqarpat pinngitsaaliissummik unitsitaanikkut, nammineq saaffiginnissutigisinnaanngisamik naammaginantumik katsorsartinnissamut tungiorneqarnissamullu inatsisissatut siunnersuut, tarnimikkut nappaatilinnut pineqartunut periarfissiinngippat, tamanna sumiginnaanertut isigisariaqarpoq. Pinngitsaaliinerli inuup nammineersinnaassusaanut innarliinerummat, inaatsisitigut illersugaaneq eqqarsaatigalugu, aalajangiinermi tunngaviit piumasaqaatillu ersarissarluakkat naapertorlugit pinngitsaaliisoqartarnissaanik qulakkeerinissarput pingaaruteqarpoq. Pinngitsaaliissummik iliuuseqarnerup inatsisitigut illersorneqarsinnaanerata kiisalu ikiuullunilu tapersersuisumik illersuisoqartitsinerup naliliivigineqartuarnissaa pingaaruteqarportaaq. Tarnimigut nappaatillip pinngitsaaliissummillu iliuuseqarfigineqartup, katsorsartinnerata isumannaatsumik ingerlanneqarnissaanut inatsisitigut sakkortuunik qularnaveeqqusiganissaa, taamaasiornitsigut qulakkiissavarput.

Napparsimasup pinngitsaaliissummik iliuuseqarfigineqartup pitsaanerpaamik periarfissarissaarnerusumilu katsorsarneqarnissaa qulakkeerniarlugu, Dronning Ingridip Napparsimavissuani tarnimikkut nappaatilinnut immikkoortortaqarfimmi taamaallaat

pinngitsaaliissummik unitsitsisoqarlunilu pinngitsaaliissummik tigummigallagassanngortitsisoqarsinnaanera siunnersuutaavoq. Sinerissami peqqinnissaqarfiup immikkoortuisa arlaanni pinngitsaaliissummik unitsitsineq aallarnerneqarsinnaavoq nalunaquttalli akunneri 48-it qaangiutsinnagit, angallannikkut periarfissat akornusiinngippata, napparsimasoq Dronning Ingridip Napparsimavissuanut nuunneqassaaq.

Allanik periarfissaqanngilluinnarpat aatsaat pinngitsaaliissummik iliuuseqarnissaq tamatigullu annikinnerpaaffissaaniititsinissap tunngaviuissaa siunnersuutaavoq. Tunngavissap tamatuma eqquutsinneqarnissaa qulakkeerniarlugu pinngitsaaliissutit tamarmik nalunaarsorneqarnissaat, nalunaarutigineqarnissaat kiisalu nammineersinnaajunnaarsitsineq ingerlatiinnarneqassappat piffissani aalajangersimasuni pinngitsoorani naliliivigineqartarniussaa pillugu maleruagassiortoqarnissaa, ilaatigut siunnersuutaavoq. Tamatuma saniatigut pinngitsaaliissummik qiterusiinikkut aalaakkikkat immikkut nakkutillisoqartinneqarnerat pillugu maleruagassiortoqassaaq.

Katsorsartinnissaq- tamatumalu pilersaarusiugaanissaanut piunnaasaqat pillugit napparsimasut pinngitsooratik ilitsersorneqarnissaasa kiisalu paasisutissinneqarnikkut akuersissuteqarneq pillugu maleruagassat, ajornanngippat napparsimasut katsorsartinnerminnut tamatigut akuersinerannik qulakkeerisussat, maleruagassiuunneqarnissaat siunnersuutaavortaaq.

Nakkutillisoqartitsisarnermut maannamut atuuttumut taarsiullugu napparsimasut siunnersorteqartinneqarnissaat siunnersuutaavoq. Kinaluunniit pinngitsaaliissummik iliuuseqarfigineqartoq pinngitsoorani siunnersorteqartinneqassaaq. Napparsimasunut siunnersortit peqqinnissaqarfiup immikkoortuisa arlaannut unitsitaanermut, uninnganerup nalaani pisunut katsorsartinnermullu tunngasut pillugit ilitsersuissuullutillu siunnersuisuussapput. Taamaasiornikkut napparsimasunut pinngitsaaliissummik iliuuseqarfiusunut tapersersuineq nukittorsarneqassaaq.

Pinngitsaaliissummik iliuuseqarfigineqarneq pillugu maalaarutit pilertortumik suliarineqarsinnaanerat anguniarlugu, maalaaruteqarsinnaaneq pillugu aalajangersakkanik nutaamik Inatsisissatut siunnersuut imaqarportaaq. Kalaallit Nunaanni Tarnimikkut Nappaatillit Maalaarutaannik Aalajangiisartunik, pinngitsaaliissummik iliuuseqarneq pillugu maalaarutit suliaqartartussanik pilersitsisoqassaaq.

Inatsisissatut siunnersuutit suliarineqarnerani suleqatigiissitanik Dronning Ingridip Napparsimavissuani tarnimikkut nappaatillinnut immikkoortortaqaqarfiup, sinerissami peqqinnissaqarfiup immikkoortuinit, Nunatsinni Nakorsaaneqarfiup, Kalaallit Nunaanni Politiimersterimit, Nunatta Eqqartuussivianit Peqqissutsimullu Naalakkersuisoqarfiup sinniisuuffigineqartunik pilersitsisoqarpoq. Inatsisissatut siunnersuut ilinniagaqassuseq akimorlugu annertuumik suleqatigiinnikkut naammassineqarpoq. Tarnimikkut napparsimasut ilaqutaasalu peqatigiiffiat Sugisaaq, Kanukoka, soqutigisaqatigiiffiit peqqinnissamut atuumassutillit assigiinngitsut kiisalu Siulittaasup Naalakkersuisoqarfiani inatsisiliornermut immikkoortortaqaqarfiup tusarniaanermi peqataatinneqarput.

Taama oqaaseqarlunga siunnersuut Inatsisartunut akuersaartumik oqaluuserisassanngortippara.